



RREGULLORE TË PUNËS SË BORDIT DREJTUES

**Prishtinë,
2019**

Në bazë të dispozitave të nenit 14 të Statutit të BPrAL Kolegji “Globus” (në tekstin e mëtejme Kolegji), Bordi Drejtues i Kolegjit, në mbledhjen e mbajtur më 06.11.2019 në selinë e Kolegjit në Prishtinë, ka miratuar këtë:

RREGULLORE TË PUNËS SË BORDIT DREJTUES

Neni 1

Dispozita të përgjithshme

1. Bordi Drejtues i Kolegjit është organi më i lartë drejtues i Kolegjit, i përbërë nga gjashtë anëtarë të zgjedhur nga Kuvendi i Aksionarëve të Kolegjit, në pajtim me ligjet e zbatueshme, Statutin e Kolegjit dhe aktet tjera normative të tij. Për punën e vet, Bordi Drejtues i përgjigjet Kuvendit të Aksionarëve të Kolegjit.
2. Bordi Drejtues është përgjegjës për të menaxhuar me veprimtarinë e Kolegjit mes dy Kuvendeve të Aksionarëve dhe vepron në pajtim me Statutin dhe aktet normative të Kolegjit dhe me këtë Rregullore të Punës të punës së vet.
3. Bordi Drejtues i bartë të gjitha përgjegjësitë për menaxhimin e Kolegjit të cilat në mënyrë shprehimore me Statut nuk i jepen Kuvendit të Aksionarëve. Ngjashëm, Bordi Drejtues do të miratojë të gjitha aktet normative për të cilat bartë përgjegjësi statutoare dhe ligjore, si dhe të gjitha vendimet dhe rregulloret e nevojshme për të siguruar funksionim ligjor të Kolegjit.
4. Anëtarët e Bordit Drejtues kanë mandat trevjeçar, me mundësi rikandidimi dhe rizgjedhjeje, ndërsa mandati i tyre do të skadojë tek pas marrjes së detyrës nga Bordi i ri Drejtues, përveç në rastet kur mandati humbet si rrjedhojë e vdekjes, shkarkimit apo dorëheqjes, me ç’rast Bordi Drejtues me vota unanime mund të vendosë për zëvendësimin e anëtarit në fjalë me një anëtar tjetër i cili këtë mandat do ta mbajë deri në mbledhjen e parë të radhës të Kuvendit të Aksionarëve të Kolegjit.
5. Bordi Drejtues mund të krijojë trupa dhe komisione të veta për t’i ndihmuar në realizimin e detyrave dhe kompetencave që i ka. Në rast të krijimit të trupave dhe komisioneve të tilla, Bordi Drejtues do të përcaktojë edhe mandatin, kohëzgjatjen dhe detyrat e tyre. Trupat e tilla do të kenë karakter këshillëdhënës dhe/ose funksional, por nuk mund të ushtrojnë veprimtari normative.

6. Bordi Drejtues ka të drejtë që të ftojë për raportim të gjithë punonjësit e Kolegjit dhe/ose persona të tretë, nëse raportimin e tyre para Bordit Drejtues e konsideron si të dobishëm apo nevojshëm për veprimtarinë e vet.

Neni 2

Delegimi i kompetencave të Bordit Drejtues

1. Bordi Drejtues i Kolegjit mund të krijojë këshilla dhe komisione ad hoc, në rast se të njëjtat konsiderohen si të domosdoshme për funksionimin e tij. Në rast të tillë, Bordi Drejtues atyre do t'ua përcaktojë detyrat, kohëgjatësinë, kompetencat dhe fushëveprimtarinë funksionale. Puna në trupa të tilla punuese do të zhvillohet në analogji me procedurat e përcaktuara në këtë Rregullore.
2. Bordi Drejtues i Kolegjit mund t'ia delegojë kryerjen e një detyre të caktuar edhe një personi të vetëm.
3. Bordi Drejtues i Kolegjit mund ta autorizojë njërin nga punonjësit profesional të Kolegjit që të kryejë ndonjë punë që është nën kompetencën e Bordit Drejtues.

Neni 3

Kuorumi, mbledhjet dhe vendimmarrja në Bordin Drejtues

1. Mbledhjet e Bordit Drejtues i fton Sekretari i Kolegjit, me kërkesë të Kryetarit apo tre anëtarëve të Bordit Drejtues, të cilët kërkesën në fjalë e parashtrojnë në formë të shkruar para Kryetarit dhe Sekretarit të Kolegjit.
2. Punimet e Bordit Drejtues i udhëheq Kryetari i Kolegjit. Në mungesë të Kryetarit, punimet e Bordit Drejtues mund t'i udhëheqë një anëtar tjetër i autorizuar nga Kryetari me shkrim, apo anëtar më i vjetër i Bordit Drejtues i pranishëm në mbledhje. Mbledhjet e Bordit Drejtues konvokohen me dërgimin e ftesës tek të gjithë anëtarët, jo më vonë se dy ditë para mbajtjes së saj. Mbledhjet e rregullta të Bordit Drejtues do të mbahen jo më rrallë se një herë në çdo muaj kalendarik.
3. Bordi Drejtues vendimet e veta i merr me shumicë votash në të gjitha mbledhjet e Bordit Drejtues në të cilat të pranishëm janë së paku katër anëtarë, e të cilat janë konvokuar në mënyrë të rregullt dhe në pajtim me ligjet e zbatueshme, Statutin e Kolegjit dhe këtë Rregullore të Punës së Bordit Drejtues. Bordi Drejtues mund të merr vendime edhe në formë elektronike edhe në bazë të nenit 5 të kësaj Rregulloreje.

4. Vendimet e Bordit Drejtues merren me shumicën e votave të hapura të të gjithë anëtarëve të pranishëm në mbledhje në të cilat ka kuorum. Në rast se një propozim merr vota të barabarta për dhe kundër, vota e Kryetarit të Bordit të Drejtorëve do të konsiderohet përcaktuese. Përfundimisht kësaj dispozite, ligjet e zbatueshme, Statuti i Kolegjit, apo Rregullorja e Punës së Bordit Drejtues mund të përcaktojnë që për disa çështje të caktuara të kërkohet shumica e votave të të gjithë anëtarëve të Bordit Drejtues ose ndonjë shumicë tjetër e kualifikuar e tyre.

Neni 4

Punimet e Bordit Drejtues

1. Anëtarët e Bordit Drejtues të Kolegjit për mbledhjet e Bordit njoftohen përmes ftesave elektronike, të cilat dërgohen së paku dy ditë para mbajtjes së mbledhjes. Anëtarët e Bordit Drejtues duhet ta konfirmojnë pranimin e ftesës dhe pjesëmarrjen në mbledhje gojarisht apo me shkrim.
2. Rendi i ditës për mbledhjet e Bordit Drejtues dhe ekstrakti i procesverbalit nga mbledhja paraprake e Bordit Drejtues, krahas të gjitha dokumenteve të cilat do të shqyrtohen në mbledhjen e konvokuar, duhet t'u dërgohen të gjithë anëtarëve të Bordit Drejtues së paku një ditë para mbledhjes së Bordit.
3. Të gjithë anëtarët e Bordit Drejtues kanë të drejtë të kërkojnë përfshirjen e ndonjë pike relevante në rendin e ditës për mbledhjen vijuese, deri në gjashtë orë para kohës së paraparë për mbajtjen e mbledhjes së Bordit. Kjo kërkesë duhet t'i parashtrohet me shkrim Kryetarit apo Sekretarit të Kolegjit, në formë fizike apo elektronike.
4. Mbledhjet e Bordit Drejtues i kryeson Kryetari i tij. Në mungesë të tij, me autorizim paraprak me shkrim, mbledhjet e Bordit mund t'i kryesojë një nga anëtarët e Bordit Drejtues. Në mungesë të Kryetarit apo një autorizimi të tillë, mbledhjet e Bordit Drejtues i kryeson anëtari më i vjetër i tij.
5. Në mbledhjet e Bordit Drejtues, për secilën pikë të rendit të ditës çdo anëtar ka të drejtë të diskutojë vetëm njëherë dhe atë jo më gjatë se 5 (pesë) minuta. Replika lejohet vetëm nëse emri i anëtarit është apostrofuar dhe mund të zgjatë jo më shumë se 2 (dy) minuta. Kryesuesi i mbledhjes mund të lejojë përjashtim nga kjo dispozitë, në rast se atë e konsideron të dobishme për mbarëvajtjen e punës së Bordit Drejtues.

6. Anëtarët e Bordit Drejtues duhet t'i përmbahen kodit të etikës dhe sjelljes profesionale përgjatë tërë veprimtarisë së tyre, në pajtim me dispozitat e ligjeve të zbatueshme dhe Statutit të Kolegjit.
7. Në rast të mosrespektimit dhe mospërfilljes së paragrafëve 5 dhe 6 të këtij neni, Kryetari i Kolegjit, ose Kryesuesi i mbledhjes ka të drejtë që anëtarit t'ia marrë fjalën dhe/ose kërkojë largimin e tij të përkohshëm nga punimet e Bordit.
8. Për të gjitha mbledhjet e Bordit Drejtues mbahet procesverbali nga Sekretari i Kolegjit, apo në mungesë të tij nga ndonjë i punësuar apo ndonjëri prej anëtarëve të Bordit Drejtues, në bazë të autorizimit nga Kryetari i Kolegjit. Procesverbali duhet t'i përmbajë të gjitha vendimet e nxjerra nga Bordi Drejtues si dhe të gjitha diskutimet substanciale në favor apo kundër vendimeve përkatëse.
9. Procesverbali i mbledhjeve të Bordit Drejtues mbahet në formë të plotë arkivat e Kolegjit, ndërsa ekstrakti i të njëjtit u dërgohet të gjithë anëtarëve të Bordit Drejtues, në pajtim me paragrafin 2 të këtij neni. Miratimi i procesverbalit nga mbledhja paraprake e Bordit bëhet në mbledhjen e parë vijuese të tij, si pikë e parë e rendit të ditës.
10. Në rendin e ditës për mbledhjet e Bordit Drejtues, raportimi para Bordit Drejtues i Rektorit të Kolegjit, si dhe i udhëheqësve të njësive tjera funksionale të Kolegjit, do t'u paraprijë vendimeve të cilat i merr Bordi Drejtues dhe miratimit të akteve normative të cilat i nxjerr Bordi Drejtues.

Neni 6

Vendimet e Bordit Drejtues të Kolegjit

1. Vendimet e Bordit Drejtues të Kolegjit mund të merren me shumicë votash në njërën nga dy mënyrat në vijim:
 - a) Në mbledhje të Bordit të Kolegjit, në të cilën të pranishëm janë së paku shumica e anëtarëve të Bordit Drejtues. Vendimet e Bordit Drejtues Kolegjit do të jenë të vlefshme në rast se për to votojnë shumica e anëtarëve të Bordit Drejtues të pranishëm në mbledhjen në fjalë.
 - b) Përmes deklaramit elektronik të anëtarëve të Bordit Drejtues, me ç'rast vendimet janë të vlefshme vetëm në rast se për miratimin e tyre deklarohen shumica e të gjithë anëtarëve të Bordit Drejtues të Kolegjit. Materialet përcjellëse dhe forma e projektvendimit që mëtohet

të nxirret përmes formës së përcaktuar në këtë nënparagraf duhet të dërgohen së paku një ditë para afatit të përcaktuar për deklaram elektronik.

2. Propozimet për nxjerrjen e vendimeve sipas formës së përcaktuar në nënparagrafin

b) të paragrafit 1 të këtij neni i përgatitë Kryetari i Kolegjit, ndërsa i administron Sekretari i Kolegjit. Propozimet e miratuara në formë elektronike u dërgohen të gjithë anëtarëve të Bordit Drejtues, përkrah njoftimit mbi votimin për to nga secili anëtar i tij.

Të gjitha vendimet e nxjerra në pajtim me këtë Rregullore të Punës nga Bordi Drejtues i Kolegjit kanë karakter detyrues për të gjithë punonjësit e Kolegjit.

Neni 7

Hyrja në fuqi

Kjo Rregullore e Punës së Bordit Drejtues të Kolegjit hyn në fuqi në datën e miratimit të saj nga Bordi Drejtues dhe nënshkrimit nga Kryetari i Bordit Drejtues të Kolegjit.

Kryetari i Bordit Drejtues

Prof.ass.dr.Betim SPAHIU